

Guillermo Trinidad ta splica

LEY DI PETROLEO TIN GARANTIA DI CONTINUACION

ORANJESTAD(AAN)— Na aña 1981, Gabinete di Don Martina, uno di e serie, a bay cas pa un rato, despues cu problemanan entorno di e protocol di petroleo a causa salida di MEP. E tempo a wordo bisa cu no por a yega na un formula reparticion di e entradanan, loke awe ta wordo refuta pa e miembro di Staten pa MEP, Guillermo Trinidad. E problema tabata e hecho cu Gabinete Martina kier a introduci e derecho di veto, esta cu Gobierno Antillano por a revoca un permiso na un o otro com-

pania pa keda encarga cu e exploracion di azeta den awanan di Aruba. E asunto a keda pendiente y e reparticion a sigui haya atencion. 50-50 a bira 70-30 a bira 75-25 y finalmente na Mullet Bay, na momento di reformacion di Gobierno Central, a yega na e formula di 85 y 15 porciento. Un formula cu a haya sosten di e mayoria cu ta formando e base pa Gobierno Central y den futuro cercano lo bay duna su aprobacion na introduccion di e ley cu mester regla e asunto aki pa semper.

DIARIO a papia cu e miembro di Staten, Guillermo Trinidad encunto e desaroyo, den cual e acuerdo di Mullet Bay ta duna caminda pa yega na e introduccion di un areglo legal.

Trinidad a bisa cu e relato tentativo di e reunion di Staten di Dialuna 8 di Juli ta wordo compila pa keda entrega na Gobierno Central. E speranza ta cu Gobierno lo atende e asunto cu diligencia, pa asina na forma mas rapido posible por pasa e ley den Staten.

Mientras e ley ta drenta

na vigor a base di un reparticion di 85-15, e fecha di Status Aparte di Aruba ta acercando y e pregunta ta, si e reparticion aki lo keda vigente. Segun Trinidad cu si. Esaki pa motibo cu semper Aruba a bisa cu e lo duna un porcentaje pa e desaroyo di Antillas. E contribucion a bira mas chikito, en vista di e salida di Aruba for di constelacion Antillano.

Legalmente rikeza natural di Aruba ainda ta patrimonio Antillano pero den un futuro cercano legalmente tambe e lo bira patrimonio

Arubano. E porcentajenan menciona lo keda manteni y pa e companianan cu e tempo tabata interesa den exploracion, esaki lo significa cu nan tin un garantia encunto continuidad di areglonan, esta tambe di e permiso cu por wordo otorga na nan..

Un fecha no a keda estableci ainda pa tratamiento di e ley en cuestion den Staten, pero ta wordo spera cu mescos cu Staten a atende e asunto cu urgencia, Gobierno Central tambe lo demostra di ta diligente.

Betico Croes:

LO MESTER BOLBE ACERCA ESNAN INTERESA DEN EXPLORACION DI PETROLEO

ORANJESTAD(AAN)— Algun aña pasa alrededor di 60 compania a demostra interes pa explora azeta den e subsuelo di Aruba. Falta di un areglo legal a haci cu e interes aki no por a materializa den accion.

Tabata un tempo bon,

manera e Consejero General di MEP, señor Betico Croes a bisa DIARIO ayera avisando cu talbez awor e interes a baha poco.

Gobierno lo mester bay realiza un sondeo pa mira cual di e companianan ainda ta interesa den

exploracion di azeta, unavez cu e areglo legal keda introduci.

Tanto Nacionnan Uni como Hulanda a priminti asistencia tecnico den e

otorgamento di permiso na companianan interes.

AINDA NADA OFICIAL ENCUNTO AGENTENAN CU LO HAYA TRASLADO

ORANJESTAD(AAN)— Aparentemente ainda no a bini ningun anuncio oficial encunto e agentenan policial cu lo haya nan traslado pa otro isla proximamente.

E asunto ta keda pendiente, mientras cu tambe e Cuerpo Policial ta en

espera.

Ta trata di un grupo di 26 agente policial, y na momento cu bira conoci kende nan ta, lo mester bay haci e tramitacion necesario pa yena e vacaturanan cu lo presenta nan mes, segun informantenan.

AUMENTO DI LEGES TA PENDIENTE


ORANJESTAD(AAN)— E aumento di leyes, esta e cambio di e Zegelverordening, ainda ta pendiente.

Den e asunto tin diferente Publicatieblad envolvi y awor Staten a pidi pa haya un texto valido promer cu e continua tratamiento di e materia, cu mester conduci na

aumento di stampia pa entre otro pasashi, manera DIARIO ya a publica.

Ta e intencion pa e asunto aki keda trata na forma urgente y den esaki ta spera cu Gobierno tambe lo actua na forma rapido, comoquiera cu ta Gobierno mes kier aumen- ta su entrada.

OFICINA CELEBRACION STATUS APARTE



ORANJESTAD(AAN)— Antayera atardi, Diputado di Cultura, Grace Bareño a inaugura e oficina cu lo fungi como centro di coordinacion di e preparacionnan pa celebracion di Status Aparte di Aruba na 1986. E oficina lo ta situa na Instituto di Cultura banda di Iglesia Catolico di Oranjestad. Durante horanan di trabao, señor Bert de Freytag lo ta disponible na e oficina pa tur informacion encunto e celebracion. E nummernan di telefon lo ta 22185 y 31618, esta e nummernan di Instituto di Cultura. Na ocasion di e apertura di e oficina tabata presente Consejero General Betico Croes y miembronan di e comision pa preparacion celebracion di Status Aparte, Mientrastanto e apertura tabata topico di e programa Aruba y su Independencia.